

*164/1995 DEKRETUA, otsailaren 14koa, Urdaibaiko Biosfera Gebenaldeko Lankidetzaren Kontseilua sortzeko dena.*

Urdaibaiko Biosfera Gebenaldea Babestu eta Antolatzeari buruzko uztailaren 6ko 5/1989 Legearen bitartez Urdaibaiko Biosfera Gebenaldeko Patronatua sortu zen, berori zuzentzeko. Patronatua erakunde hauetako ordezkariak osatzen dute: Eusko Legebiltzarra, Eusko Jaurlaritza, Bizkaiko Foru Aldundia, eraginpeko udaletxeak, Estatuaren administrazioa, Unescoko «Gizakia eta Biosfera» egitasmoa, Euskal Herriko Unibertsitatea, Urdaibaiko Biosfera Gebenaldeko eremuan lan egiten duten erakunde ekologista eta babesleak, ingurugiroa aztertzeko eta babesteko lan aipagarria egin duten Euskadiko erakundeak eta gebenaldeko artezkari arduraduna.

Geroztik, Urdaibaiko Biosfera Gebenaldeak hartzen duen lur eremuan eragina duten zenbait gizarte sektore ordezkariak osatzen duten erakundeek gebenaldeko egintzen garapenean parte hartzeko asmoa erakutsi dute.

Horiek horrela, derrigorrezkotzat jotzen da parte hartzeko bideak irekitzea eta ildo horretatik, komenigarri ikusten da eskakizun horiei erantzuna emango dien organu laguntzaile bat sortzea.

Organu berri horretan berebiziko garrantzia izango du Urdaibaiko Biosfera Gebenaldeko artezkari arduradunak, bera izango baita organuaren eta patronatuaren arteko informazio zubi. Artezkariaren betebeharrak arau honetan daude jasota eta Urdaibaiko Biosfera Gebenaldeko Patronatuaren aldeko irizpena jaso dute.

Ondorioz, Lurralde Antolamendu, Etxebizitza eta Ingurugiro sailburuaren proposamenez, Jaurlaritzaren Kontseiluak 1995eko otsailaren 14an egindako bilkuran aztertu eta onartu ondoren hauxe:

#### XEDATU DUT:

1. atala.– Urdaibaiko Biosfera Gebenaldeko Lankidetzaren Kontseilua sortzea. Erakunde hori Patronatuari laguntzeko sortzen da eta Eusko Jaurlaritzako ingurugiro organuari dago atxikita.

2. atala.– 1.– Lankidetzarako Kontseiluan parte hartzeko derrigorrezkoa izango da behar bezala legeztatutako erakundeak izatea eta egoitza soziala edo ordezkariaren bat Urdaibaiko Biosfera Gebenaldeak hartzen duen lur eremuan izatea. Horretaz gain, erakunde horien estatutuetan jasota egongo da bertako jabe eta biztanleen interesen alde eta naturaren azterketan edota defentsan iharduten dutela edo, bestela, Urdaibaiko eremuan diharduten gizarte, ekonomi eta kultur sektoreen ordezkari izan beharko dute.

2.– Lankidetzaren Kontseilua osatuko duten erakundeak izendatzeko ihardunbidea hau izango da:

a) Interesa duten erakundeek Urdaibaiko Biosfera Gebenaldeko Patronatuari zuzendutako eskabidea izapidetuko dute. Bertan, atal honen lehenengo zatiko eskakizunak betetzen direla egiaztatuko beharko da.

b) Patronatuko lehendakariak, osoko bilkurari entzun ondoren, Lankidetzaren Kontseiluko erakundeak izendatuko ditu.

c) Erakunde bakoitzak Lankidetzaren Kontseiluan izango duen ordezkaria izendatuko du.

3.– Urdaibaiko Biosfera Gebenaldeko Lankidetzarako Kontseiluaren eginkizunak hauek izango dira:

a) Ordezkatutako sektoreen interesak eta iharduerak eta Urdaibaiko Biosfera Gebenaldeko helburuak eta egintzak era harmonikoan koordinatzeko irizpideak eta neurriak sustatzea.

b) Urdaibaiko Biosfera Gebenaldeko iharduerak garatzerakoan Lankidetzakontseiluan ordezkaturik dauden erakundeen arteko lankidetzak sustatzea.

c) Ordezkatutako erakundeen eta Urdaibaiko Biosfera Gebenaldearen artean, denentzat interesgarri diren egintzak antolatzea.

d) Koordinazioa, harmonizazioa, parte hartzea eta, oro har, Biosfera Gebenaldearen helburuak lortzeko egoki ikusten diren ekimen, proposamen eta iradokizunak Urdaibaiko Biosfera Gebenaldeko Patronatuaren aurrera eramatea.

e) Urdaibaiko Biosfera Gebenaldeko Patronatuak proposatzen dizkion gaietarako irizpena ematea.

f) Kontseiluaren beraren antolaketa eta funtzionamendurako araudia onartzea edota aldatzea.

3. atala.– 1.– Lankidetzakontseiluaren deiak bertako kide batek egingo ditu bai eta lehendakari lanak ere, Zaingo Batzordeburuak horretarako izendatuta, Lankidetzakontseiluko kideetako 2/3k proposatuta.

2.– Lankidetzakontseiluko lehendakariaren agintaldia bi urtekoa izango da eta luzatu egin ahal izango da beste aldi gehigarri batez bakarrik.

3.– Lehendakaria Zaingo Batzordearen eta Lankidetzakontseiluaren arteko informazio zubi izango da eta horretarako honako egiteko hauek egokituko zaizkio:

a) Zaingo Batzordeak hartzen dituen akordioen berri ematea Lankidetzakontseiluari aldian-aldian.

b) Lankidetzakontseiluak hartzen dituen akordioen berri ematea Zaingo Batzordeari.

4.– Urdaibaiko Biosfera-Gebenaldeko Zaingo Batzordeko zuzendari-artatzaileari, organo laguntzaile horren jardura sustatzea eta administrazio kudeaketa egitea egokituko zaizkio, bai eta Zaingo Batzordearen kudeaketa artezpideak eta jarduteko egitarauen burutzapen egoeraren berri ematea ere Lankidetzakontseiluari urtero.

5.– Idazkari lanak egingo ditu Urdaibaiko Biosfera-Gebenaldeko Zaingo Batzordean kide den kargua duenak, eta hura egon ezean, Gebenaldeko zuzendari-artatzaileak.

## GEHIGARRIZKO XEDAPENA

Lankidetzakontseiluari, kide anitzeko organoa den aldetik, azaroaren 26ko 30/1992 Legearen II. idazpuruko 2. atalean jasotzen den araudi orokorra ezarriko zaio, osagarri gisa.

## AZKEN XEDAPENA

Dekretu hau Euskal Herriko Agintaritzaren Aldizkarian argitaratzen den egunaren biharamuneari jarriko da indarrean.

Lehendakaria,  
JOSÉ ANTONIO ARDANZA GARRO.

Lurralde Antolamendu, Etxebizitza eta Ingurugiro sailburua,  
FRANCISCO JOSÉ ORMAZABAL ZAMAKONA.